

Gyaez Guhcaemz Dwg Gij Diensingq Dou

“Cozyez daiq lai lo!” Gyoengq doengzhag bouxboux cungj ienq naeuz, gou hix gyangznaek danqheiq.

Cuengqhag le, gou vaiqviet buet ma ranz. Mwh gou sij cozyez sat, gaenq gig gvaiz lo. Gou siengj: Sij baenzlai cozyez, wnggai ndaej yawj densi luba. Yienghneix gou couh hai densi yawj. Mwh gou cingq yawj haeujmaez, daxmeh byaij gvaqdaej lo, de najndaem najlaep doiq gou naeuz: “Vaiq di gven densi bae ninz, haetcog lij bae hag ne! Danghnaeuz caiq baenzneix roengzbae, couh yingyangj hagsib bw!” Gou naeuz: “Sij baenz lai cozyez, couh mbouj ndaej yawj saek yaep densi ha?” “Seizneix geij diemj cung lo, vaiq bae ninz!” Ai, dinggeng mbouj miz yungh, gou cijndeij mbouj gamsim gven densi bae ninz lo.

Haet daihngaih hwnqdaej, cat heuj swiq naj sat le, gwn haexcaeux, gou raen gwnz daiz mbouj miz binggyaeqmanh gou maij gwn haenx. Gou maij gwn bingj neix lai lo,



diuzmanh caeuq gienghhaeux, gyaeq-gaeq cien baenz binggyaeqmanh, gij feihdauh neix caen dwg gwnzmbwn nanz ra, lajbiengz noix miz ha, hawj vunz baez siengj hwnj couh myaiz rihroedroed. Daxmeh cix naeuz: “Diuzmanh dwg gijgwn nyapnyaj, doiq ndangdaej sienghah lai. Yaeq gaujsi lo, aeu lai haeusim ndangdaej, gaej caiq gwn gij doxgaiq neix lo.” Ai, gou cijndeij nyienghbough, gwn vanj dang

ndeou couh bae hagdangz lo.

Daengz hagdaengz le, lauxsae umj dab sigienj he haeuj gyausz. Gyoengq doengzhag ienq naeuz: “Dai lo, youh yaeq gaujsi. Lauxsae suyoz couh dwg rox caegguk, ai!”

Banngaiz cuengqhag ma daengz ranz, gou siengj: Cungjsuenq gaujsi sat lo, wnggai ndaej loengh dennauj yaep deu luba? Yienghneix, gou couh angqvauvau caeuq gobiuj doxcae dwk dennauj youzhi. Cingq dwk ndaej angqfwngfwng, gou sawqmwh roxnyinh daengz raeblaeng miz maz mbouj deng. Gou baenq gyaeuj gvaqbae, raen daxmeh mbouj rox seizlawz gaenq ndwn youq raeblaeng gou lo. Cij raen de song fwngz cab hwet, dagaengz da’ mboet, hozndat dwk daengx gou, gou deng hwk dwk swenj sing “va” ndeu, sikhaek daj gwnz eij saet hwnjdaej! Daxmeh hozndat dwk naeuz: “Byawz hawj mwngz dwk youzhi ha? Vaiq gven dennauj bae, gijmaz seizhaeuh lo lij loengh dennauj! Danghnaeuz mwngz dawz cungj rengz

neix yungh daeuj doegsaw, geijlai ndei ha!” Dingq daxmeh naeuz gou, gou ndawsim itbak aen mbouj fug, it cien aen mbouj nyienh’ eiq—— Vihmaz dou lwgnyez couh mbouj ndaej dwk youzhi? Gou neix heuhguh “cuengq-mbin bonjfaenh”! Hoeng, youq baihnaj daxmeh, gou moix baez cungj “mbin” mbouj hwnjdaej, ai……

Haujlai vunzhung cungj nyinh-naeuz cujyau yinvu lwgnyez dwg hagsib. Neix dangvienz mbouj loek, hoeng gyoengqde lumzbae “gyaez guhcaemz” cij dwg diensingq dou. Doenggvaq gak cungj guhcaemz, ndaej hawj dou lwgnyez daiq daeuj yinx-daeuz lailai, hix hawj dou miz siengjgap geizgiuj, lij ndaej hoizsoeng gij atlig hagsib. Mwh wnggai hagsib couh hagsib, mwh wnggai guhcaemz couh guhcaemz, hagsib caeuq guhcaemz giethab, neix miz maz mbouj ndei ne? Vunzhung vihmaz itdingh fanjdoiq ne? Ai, daxboh daxmeh, aen seiqgyaiq dou sou mbouj rox.

(haj nienzgaep Lij Bozwnz)

Gou Gyaez Gonim

Beixmbauq naeuz de gyaez goleux, goleux youh sang youh hung.

Gou naeuz gou gyaez gonim, gonim sang caeuq gou doxlumj.

Beixmbauq riu gou naeuz: Huk lai! Mbouj miz ceiqliq!

Gijmaz heuh guh mbouj miz ceiqliq ne, gou mbouj rox.

Gou gyaez gonim. Gonim hai va seizde, gou bae gwnz bo liuh, gonim rim bo cungj angqfwngfwng vaeg baenz cumh baenz cumh va——angqcoux gou. Goleux couh guhlawz ne? Gou baezbaez byaij gvaq laj goleux ngiengx gyaeuj yaeq yawjyawj dujva ndinghoengz de, de cungj mbouj leixlangh gou.

Gou gyaez gonim. Gonim

mak gug le, gou bae gwnz bo liuh, gonim rim bo cungj angqfwngfwng vad fwngz——couh lumj naeuz: Mak dou van lwi? Ndeigwn lwi? Ndeigwn couh caih mwngz mbaet bae gwn. Goleux couh guhlawz ne? Gou baezbaez byaij gvaq laj goleux ngiengx gyaeuj yaeq yawjyawj gij mak gwn mbouj ndaej de, de cungj mbouj leixlangh gou.

Beixmbauq naeuz: Gonim youh daemq youh iq suenq gijmaz, goleux youh sang youh hung dwg faexak bw.

Goleux youh sang youh hung couh ak lai ha? Ngoenzde, laj bya mbouj dwg miz song go goleux youh sang youh hung de deng rumzlaux bongj boed,



laemx youq gwnz namh ma? Hoeng gonim youh daemq youh iq rim gwnz bo de, mbouj miz saek go deng rumzlaux boedrag gvaq bw!

(Daj 《Bonjsei Sim Lwgnyez》 (Veiz Gizlinz raiz) senj okdaej, Lwgfwnzme/卢奋长 hoiz)

Caz Swdenj

Gwn sat haexcaeux le, mwh go sij cozyez, goengda sij cih Sawgun “度” ndeu, gou caeuq daxmeh cungj mbouj rox.

Gou hai bonj swdenj, ndawsim gag naemj: Cih saw neix caengz raen gvaq, mbouj ndaej yungh gyoepyaem daeuj caz. Yienghneix gou biengj daengz yieb biuj busouj caz cih, caz aen’ gyaeuj cih “广”, youq 45 yieb, gou geq miz 11 veh, hoeng gou ra haujlai nanz hix ra mbouj raen. Gou sawqmwh siengj daengz daxmeh gaxgonq caeuq gou gangj gvaq “caz busouj gonq, caiq caz cawz busouj le linghvaih geij veh”. Ciuq fuengfap deng bae caz, gou youq ndaw roek daengz bet veh ra daengz cih saw neix lo, biengj daengz 508 yieb, laxlawz cih saw neix doeg “tuǒ” (gyoepyaem Sawgun). Gou caz daengz le, gipmuengz lwnh goengda. Goengda naeuz: “Neix dwg aen singq boux-sinhvwnzfazyenzyinz dangj cibgouj daih.”

Ngoenzneix, gou hag ndaej cih saw moq ndeu, gou angq lai lo.

(ngeih nienzgaep Yenz Yizhauz)

Feih Ndit



Ndit miz feihdauh bw! Seizcin, feihdauh de dwg homfwdfwd, moqsagsag, ndoet cenj ndit ndeu, daengx ndang soengswt; seizhah, feihdauh de manhsaengsaeng, ndatfwdfwd, ndoet cenj ndit ndeu, hanh rihroedroed; seizcou, feihdauh de dwg swnhhom naekna, ndoet cenh ndit ndeu, fiz youq ndaw doenghnaz; seizdoeng, feihdauh de dwg damhcit raeujrub, ndoet cenh ndit ndeu, lumz nitgyoet bae.

Seizneix, fandez gou dak youq baihrog, ndit dak gwnzde, feihcumx fwi bae, feihraeuj rim denz. Feih ndit, gou gyaez de!

(it nienzgaep Cwnz Sinhyaj)